

Na osnovu člana 39. stav 5. Zakona o sjemenu i sadnom materijalu šumskih i hortikulturnih vrsta drveća i grmlja ("Službene novine Federacije BiH", br. 71/05 i 8/10), federalni ministar poljoprivrede, vodoprivrede i šumarstva donosi

**PRAVILNIK
O NAČINU I METODOLOGIJI STRUČNOG PREGLEDA PROIZVODNJE SADNOG
MATERIJALA**

Član 1.

Ovim Pravilnikom propisuje se podnošenje prijave za obavljanje stručnog pregleda proizvodnje šumskog i hortikulturnog sadnog materijala (u daljnjem tekstu: stručni pregled), način i metodologija stručnog pregleda i izdavanje uvjerenja o porijeklu i kvalitetu sadnog materijala.

Član 2.

Ovaj pravilnik se usklađuje sa Direktivom vijeća Evropske unije o stavljanju na tržište šumskog reproduccionog materijala broj 1999/105/EZ od 22.12.1999. godine u dijelu koji se ona na isti odnosi, kao i Preporukom Komisije Evropske unije broj:2012/90/EU od 14.2.2012. godine o smjernicama za prezentaciju informacija za identifikaciju pošiljki šumskog reprodukcijuskog materijala i informacijama koje sadrži dokument ili deklaracija dobavljača.

Član 3.

- (1) Stručnom pregledu podliježe proizvodnja sadnog materijala šumskih i hortikulturnih vrsta iz člana 3. Zakona o sjemenu i sadnom materijalu šumskih i hortikulturnih vrste drveća i grmlja ("Službene novine Federacije BiH", br. 71/05 i 8/10) (u daljnjem tekstu: Zakon).
- (2) Obaveznim stručnim pregledom proizvodnje šumskog sadnog materijala utvrđuje se: njegovo porijeklo, vrsta, starost, način uzgoja, vegetativna razvijenost, kvalitet, količina i zdravstveno stanje.

Član 4.

- (1) Proizvodnja šumskog i hortikulturnog sadnog materijala podliježe obaveznom stručnom pregledu dva puta u toku godine, na početku i na kraju vegetacije (u daljnjem tekstu: proljetni stručni pregled i jesenji stručni pregled).
- (2) Stručni pregled se može provesti i više puta na zahtjev proizvođača sadnog materijala o čemu se također sastavlja izvještaj o stručnom pregledu.

Član 5.

Stručni pregled vrši ustanova koju ovlasti Federalni ministar poljoprivrede, vodoprivrede i šumarstva (u daljnjem tekstu: ovlaštena ustanova).

Član 6.

- (1) Proizvođač podnosi prijavu za obavljanje stručnog pregleda ovlaštenoj ustanovi na obrascu 1 koji se nalazi u Prilogu broj 1 ovog pravilnika i čini njegov sastavni dio.
- (2) Najkasnije 15 dana prije sjetve sjemena ili sadnje vegetativnih dijelova biljaka proizvođač podnosi prijavu za obavljanje stručnog pregleda.
- (3) O obavljenom stručnom pregledu sačinjava se zapisnik na obrascu 2 koji se nalazi u Prilogu broj 2 ovog pravilnika i čini njegov sastavni dio.

Član 7.

- (1) Proljetnim stručnim pregledom sadnog materijala utvrđuje se:
 - a) fiziološko stanje i vitalitet svih sadnica u rasadniku,
 - b) procenat iskljicalih sijanaca u odnosu na zasijanu površinu,
 - c) fiziološko stanje i vitalitet klijanaca,
 - d) zdravstveno stanje sijanaca, školovanih sadnica i klijanaca,
 - e) pojavljivanje štetnih insekata i fitopatogenih gljiva i intezitet njihovog pojavljivanja,
 - f) prisustvo pojedinih korovskih vrsta i njihov intezitet pojavljivanja,
 - g) štete na sadnom materijalu nastale djelovanjem drugih abiotskih i biotskih faktora (mraz, grad, snijeg, krtica i dr.).
- (2) Jesenji stručni pregled se vrši u pravilu nakon završetka vegetacionog perioda pri čemu se utvrđuju kvalitetne klase sadnica na osnovu kvantitativnih pokazatelja (prečnik na vratu korijena i visina nadzemnog dijela sadnice) i na osnovu kvalitativnih pokazatelja (vitalitet) prema važećim standardima.
- (3) Kvantitativni pokazatelji se određuju na osnovu reprezentativnog uzorka od ukupne količine sadnica za svaku vrstu odvojeno.
- (4) Kvalitativni pokazatelji se određuju pregledom svih sadnica u rasadniku.
- (5) Zdravstveno stanje sadnica se utvrđuje na osnovu oštećenja na sadnicama nastalih od štetnih insekata, fitopatogenih gljiva i drugih abiotskih i biotskih faktora.
- (6) Zdravstveno stanje sadnica utvrđuje se na svim sadnicama u rasadniku odvojeno po vrstama drveća. U cilju utvrđivanja prisustva pojedinih patogena ovlaštena ustanova može provesti dodatne analize u laboratoriji.

Član 8.

- (1) Nakon provedenog stručnog pregleda proizvodnje sadnog materijala i na osnovu nalaza stručnog pregleda, ovlaštena ustanova izdaje uvjerenje o porijeklu i kvalitetu sadnog materijala, odnosno rješenje da proizvedeni sadni materijal ne odgovara propisanim uvjetima.
- (2) Uvjerenje o porijeklu i kvalitetu sadnog materijala izdaje se na obrascu 3 koji se nalazi u Prilogu broj 3 ovog pravilnika i čini njegov sastavni dio.

Član 9.

Stupanjem na snagu ovog Pravilnika prestaje primjena Pravilnika o načinu i metodologiji stručnog pregleda proizvodnje sadnog materijala („Službene novine Federacije BiH“ broj 79/07).

Član 10.

Ovaj Pravilnik stupa na snagu narednog dana od dana objave u "Službenim novinama Federacije BiH".